

بِسْمِ اللَّهِ الرَّحْمَنِ الرَّحِيمِ

Khutba Jummah

HADHRAT KHALIFATULLAH

Munir Ahmad Azim

13 Février 2015 ~
(22 Rabi'ul Aakhir 1436 Hijri)

(Résumé Khutba)

Après ki li fine saluer tous so bane disciples (et tous bane musulmans) entier le monde par la salutation de paix en Islam, Hazrat Khalifatullah (atba) fine commence so Khutba Jummah comme d'habitude avec Tashahhud, Ta'uz, Surah Al Fatiha, et ensuite li fine dire:

Ene l'idée fausse, très grave ki pé prend l'ampleur dans mo l'époque, dans sa siècle là, avec la Manifestation Divine, et ki fine mette en question tous bane fondations de tous bane religions, de sorte ki l'essence même de la religion li complètement révolutionné et en resulta, au lieu de la lumière divine de la révélation, c'est bane l'idées et conceptions de l'esprit de l'homme ki fine prend place, et présenté comme la vérité et alors c'est sa définition tout à fait fausse à propos de la révélation là ki le monde en générale accepter de nos jours. L'indépendance de bane pensées et de la longueur du temps ki fine fini passé depuis l'apparition du sceau de bane prophètes Hazrat Muhammad (saws) fine amène la plus grande partie du monde pou croire ki la révélation ti nek ene simple source d'inspiration de l'esprit. Sa pensée là fine prend naissance à cause la croyance et la conception ki Bondié (Allah) pas capave cause par bane paroles, bane mots parski Li pas ene Être matériel et Li pas dépende lors bane moyens matériels couma l'homme.

Mo pé donne ene explication d'après mo propre l'expérience personnelle ki la révélation li convié par bane mots, bane paroles et sa transmission de parole, de mots, de message là li tellement réel et certain, sans le moindre doute, pareil couma ene dimoune cause avec ene l'autre dimoune. Si la révélation pas ti transmette par bane mots, li pas ti pou capave totalement exempté de doute et pas ti pou capave dirige l'homme vers ene certitude parfait. Parski si li prend tout so bane inspirations comme ene révélation divine, alors sak dimoune ti pou croire ki li-même li inspirer et alors ti pou capave de sa façon là trompe li-même et trompe l'humanité, et sa zaffaire là fine déjà exister à plusieurs reprises dans le passé, depuis le temps ki dimoune fine commence mette dans zot l'esprit sa fausse l'idée ki zot bane inspirations c'est bane révélations et alors depuis sa temps là, sa fausse conception de révélation là fine vine choses courantes parmi dimoune. La révélation li destiné pou enlève tous bane doutes et bane l'idées fausses, et si alors si ene révélation pas transmette par bane mots, li alle ouvert encore plisse bane la portes de doute et d'incertitude, parski alors pas pou ena aucaine moyen pou distingue entre révélation

et bane imaginations de propre l'esprit de l'homme. La révélation li déssane, li convié par bane mots, bane paroles de nature extraordinaire, ki rempli de gloire et de majesté, et aussi dans la révélation ene dialogue, ene communication entre Allah et l'homme li possible dans même façon ki ene dimoune gagne ene l'autre conversation avec ene l'autre dimoune. Allah fer la révélation déssane coumsa afin ki sa récipiendaire de la révélation là arrive à ene stage de certitude, ki suffi pou li comme preuve et argument et ki retire tous bane doutes.

Kan à la question pou conné sipa Allah ena ene la langue avec quoi Li causé, alors zot bizin conné ki Allah pas dépanne d'aucaine moyen matériel pou exprime So volonté, et ki couma Li fine créer ene l'univers matériel sans aucaine la mains et ki Li capave trouver sans aucaine lizié matériels, alors Allah capave aussi causer sans l'aide d'ene la langue physique, matériel. En effet, quand nous dire ki Allah causer, nous pas pé rode dire ki Li causer par moyen d'ene la langue, mais seulement ki Li dirige bane tels mouvements dans la nature ki pou exprime zot en forme de mots et ki destiné à sa dimoune ki Li (Allah) oulé ki li recevoir là, c'est-à-dire, sa récipiendaire de la révélation là. En aucaine cas Allah pas bizin le moyen de bane mots pou exprime Li, mais c'est l'homme ki bizin gagne la révélation li, li ki bizin sa bane mots, sa bane paroles là. Mo pas pé seulement déclarer ki la révélation li révélé en forme de bane mots, de bane paroles, mais aussi mo fine vive, mo fine expérience li, et *Alhamdulillah*, à travers duahs de sa humble serviteur (ki présent devant zot azordi) beaucoup de bane dimounes, mo bane disciples, bane chercheurs de vérité et bane les autres dimounes depuis le commencement de la Manifestation Divine dans Maurice fine capave bénéficier de sa puissance spirituelle ki Allah le Tout-Puissant fine accorde moi, et sa bane dimounes là ti capave et aussi toujours pé recevoir bane telles révélations là, et sa bane révélations là zot bane indications claires ki sa dimoune (le récipiendaire) avec ki zot fine attaché là, pareil couma ene abeille attiré à ene fleur, pareil couma ene branche li attaché avec ene z'arbe, pareillement, zot aussi zot gagne sa capacité de la part d'Allah pou gagne sa la lumière là depuis la lumière de sa porteur de lumière là, sa dimoune spéciale ki fine vine distribuer sa la lumière là, ene telle dimoune ki Allah fine choisir pou zot dans sa siècle là afin pou retire zot tous de l'obscurité de l'ignorance et de bane péchés.

Mais parfois, même, très souvent, bane dimounes pas réussi ressenti l'essence de bane vrais révélations parski zot fine ferme zot lécoeur à sa. Avec ene lécoeur fermé, pareil couma ene la porte fermé, avec bane la fenêtres fermé et bane rideau dressé dans la caze, kot alos la caze là vine dans noire, alors si ene kikaine fer sa, eski li capave attane ki la lumière soleil pénétrer so la caze ? Pareillement, if le cœur de quelqu'un li fermé, eski li capave attane pou ecevoir la lumière divine à l'intérieur de li, et laisse sa la lumière là guide li dans le droit chemin ?

Le Messenger d'Allah, le représentant d'Allah lors la terre, pareil couma sa humble serviteur d'Allah ki fine être envoyé à zot tous dans sa siècle là, alors sa Messenger d'Allah là li, li ena le devoir pour transmette le message. Li pas ena le pouvoir pou ouvert bane les cœurs et laisse sa la lumière là pénétrer là-dans. Li capave seulement propage sa la lumière là à l'extérieur, et pou laisse bane dimounes assimile sa message endan zot, mais li (Messenger d'Allah là) li pas ena le pouvoir pou change l'état de bane les cœurs, à moins ki le pouvoir et la volonté d'Allah permette à sa dimoune ki recevoir sa la lumière là de la part de sa Messenger d'Allah là pou gagne la foi et accepter sa la lumière là dans li. Parfois, sa chercheur de vérité là recevoir bane faveurs de la

révélations comme ene moyen pou confirme la véracité de l'Envoyé d'Allah ki causé par le Saint Esprit (*Ruh-il-Qouddus*). Kan li recevoir sa, sa renforce so croyance et la foi dans Allah et dans Messenger ki Li fine envoyé, mais malheureusement, ena aussi bane kalité dimounes ki malgré ki zot fine témoigne bane révélations divines ki déssane lors le Messenger d'Allah, et kot zot fine zot-même être bane récipiendaires de la révélation pou confirme bane révélations et la véracité du Messenger d'Allah, alors zot tourne le dos à tout sa, et zot qualifié sa bane révélations là comme ene simple illusion de l'esprit. Sa bane kalité dimounes là zot le plus malheureux de bane dimounes, parski après avoir ki zot fine gagne et percevoir la vérité, zot préfère qualifier tout sa la vérité comme bane mensonges et illusion et imaginations afin pou gagne ene prétexte pou zot pou tourne le dos à la vérité ki vine d'Allah.

Par sa exposition de la nature de la révélation, mo fine donc donne bane moyens pour arrête sa tendance offensif et dangereux ki pé abatte lors la religion et ki pé balyé l'autorité de tous bane livres divines sous prétexte ki révélation c'est seulement ene simple inspiration. Par conséquent, l'inspiration couma tout humain recevoir comme bane connaissances afin pou vive lors la terre pas capave être comparé à la nature exceptionnelle de la révélation ki déssane lors ene dimoune élu d'Allah ki agir comme ene garantie et caution de la source divine et de la nature de bane mots, de bane paroles ki li recevoir d'Allah pour le bien-être de toute l'humanité.

Ki Allah contigné béni le Jamaat Ul Sahih Al Islam avec bane révélations et proximité avec Allah (tw). Pareil couma ene fois mo ti gagne sa révélation là : **Dip in the light of Allah and sip His love**. Alors, pli zot pou plonge dans la lumière d'Allah, pli zot pou goûte So l'amour. *Insha-Allah. Ameen.*

Avant mo termine mo Khutba, mo ti envie dire quelques mots lors bane accusations et l'arrestation ki l'ex-Premier ministre de Maurice, Navinchandra Ramgoolam fine bizin subir depuis vendredi dernier 06 Février 2015. Sa ene leçon ki faudé jamais arrogant dans la vie et fer Maurice vine dans ene telle cercle kot li dirigé dans ene façon autoritaire intérieurement, tandi ki extérieurement pé fer croire ki li pé dirigé dans ene façon démocratique. Zot pou rappelle mo bane chers disciples, ki depuis 2010, moi et certains de nous bane membres fine alle de circonscription en circonscription pou invoque Allah pou renverse ene tel parti et leader politique ki so programme c'est pou fini Maurice, et pou amène bane Mauriciens dans ene l'état de pauvreté et dans ene l'état économique bien serré.

Et zot pou rappelle ki tout récemment dans le cadre de bane élections générales 2014, mo fine fer zot part d'ene rêve ki mo ti fer kot Sir Aneerood Jugnauth pas ti pé condamne Paul Bérenger, mais au lieu de sa, ti pé fer so éloges pou bane stratégies ki li ena (pou néttoye l'île Maurice et le Parti travailliste également). Et zot témoin ki depuis vendredi 06 Février, 2015, l'ancien Premier ministre Navin Ramgoolam fine placé en état d'arrestation. Li fine même passe quelques heures dans le centre de détention de Moka avant ki fine amène li devant le **Bail and Remand Court**. Week-end dernier ti ene l'enfer pour li; li fine déchiré entre bane la fouille dans so la caze et bane va-et-vient à CCID (et sa toujours le cas en ce moment, l'enquête encore pé contigner) afin pou donne l'enquête lors l'enquête, déclarations lors déclarations, et pou compter bane millions l'argent (plisse ki Rs. 140 millions (hier matin) – Rs.185 millions hier soir – et encore pé compté –

ki fine saisi dans so la caze maison de deux coffres-forts massifs et deux grands valises) et li fine bizin fer sa devant Central CID, bane la police, avocats, représentants de la Banque de Maurice et bane officiers gouvernement. Li ene suspect de blanchiment l'argent et aussi impliqué dans l'affaire de meurtre dans Roche-Noire. Li fine arrêter et humilié au milieu des milliers de Mauriciens ki ti rassemblé autour so la caze (ancien la caze so papa) pou guette la fin de so carrière politique, et pou témoigne de so arrestation.

Bane dimounes ti pé moque Paul Bérenger à cause ki li fine associé li avec ene tel dimoune ki fine salir réputation de l'île Maurice et ki fine mette so peuple dans bane situations difficiles. Mais laisse mo fer la nation rappelle ki aujourd'hui, par la volonté d'Allah, c'est grâce à sa bane coucachiette (coussetik politique) et « **on and off** » là, et la décision finale pou alle vers ene élection générale en tant ki l'alliance PTR-MMM, ki sa fine amène sa même dimoune ki maintenant responsable devant la loi pou fraude et suspect dans ene affaire de meurtre vers so la perte. Pensé bien, si pas ti ena tout sa, alors so mandat comme Premier Ministre fini officiellement en Mai 2015 et alors pas ti pou ena tout sa bane nettoyage là. Avec sa bane mariages et divorces politiques là, ene telle situation fine arriver kot sa fine fer Navin Ramgoolam croire dans so la victoire proche, kan li fine gagne Paul Bérenger à so côté. Li ti croire li pou triompher dans bane élections générales. Mais malheureusement pour li, sa pas fine être le cas. Et après l'arrestation de l'ex-Premier Ministre, alors ki li l'actuel premier ministre et le chef de l'opposition pas pé paraître regrette trouver l'ex Premier ministre dans ene telle mauvais situation. En effet, dimoune récolté saki li semé. En effet, même si Paul Bérenger fine fer ene suicide politique – kot li fine mette so l'honneur en politique en jeu – li fine récolté bane fruits de so bane bonnes l'intentions pour nettoye l'île Maurice kot li fine élu comme ene membre du Parlement et, récemment, la confiance de bane membres de so mouvement en li fine doublé et li fine encore ene fois élu chef de so mouvement tandi ki de l'autre côté, l'ex-Premier Ministre fine perdi élections générales et li pé maintenant fer face la situation pou démissionner comme chef de so mouvement politique.

Allah Grand et pé montré sa humble serviteur là et la nation mauricienne concernant couma sa duah ki mo fine fer là sans aucaine égoïsme – mo fine pense à la nation mauricienne – fine réaliser, kot sa li pour le bien-être future de Maurice. *Alhamdulillah*. Allah pé maintenant fer tout bane zaffaire vine claire, ki li dans domaine politique et aussi le domaine spirituelle. *Insha-Allah*, ki Allah donne moi le courage et la capacité pou compile tous bane signes ki fine manifesté par duah et pour prouve la véracité de So humble serviteur, le Khalifatullah. *Ameen*.

Mo rappelle sa révélation là ki Allah ti révèle depuis longtemps (2001-2002) ki Li pou amène bane dimounes coumsa vers zot destruction, petit à petit, sans ki zot réaliser. (et couma mo fine fek mentionne avec zot)

Tous bane louanges appartenir à Allah. Bane Injustices zamais destiné pou resté pour longtemps. Ene jour ou l'autre, Allah pou rétablir la justice d'ene telle façon sublime afin pou renforce la foi de bane dimounes dans Li. *Alhamdulillah*.